



**Ika-Kawhaag-Usa nga Dominggo  
sa Kasarangang Panahon  
Agosto 24, 2014**

**Ma-Dominggong Tamdanang Liturhikal alang sa  
Simbahan sa Kabus sa Diwa sa Bag-ong Ebanghelisasyon**

**Matuman sa Simbahan  
sa Kabus, pinaagi sa  
Gagmayng Simbahanong  
Katilingban, ang iyang  
identidad diha sa iyang  
pagpatigbabaw sa bag-ong  
pamatasan sa panaghiusa  
tali sa mga nasud ug sa  
mahigugmaong pagdapig  
sa mga kabus subay sa  
sugo ni Kristo kang Pedro  
sa Simbahan.**

Ang promosyon ba sa pamatasan kabahin sa internasyonal nga panaghiusa tali sa mga nasud mao ang usa ka buhat sa buhing pagtuo diha ni Jesus ug sa iyang gibarogan? Sa unsang paagiha nga kita, isip Simbahan sa Kabus, isip Gagmayng Simbahanong Katilingban, mahigugmaong modapig sa mga kabus diha sa diwa ni Kristo nga nagsugo ni Pedro sa Simbahan? Uban sa PKP-II, magpadayon kita sa pagpamalandong sa gasa sa Pagtuo nga gihatag sa Dios kanato pinaagi ni Jesus. Ang PKP-II nag-ingon:

**2.a) Pag-ampo ug Pagsimba**

(74) Ang atong pagtuo buhi ug motubo pinaagi sa pag-ampo ug pagsimba. Ang tibuok nga Kristohanong kinabuhi

kinahanglang usa ka pagsimba nga gihalad ngadto sa Dios. Kinahanglang atong ihalad ang atong tibuok mga kaugalingon ‘ingon sa usa ka buhi nga halad, balaan ug makapahimuot sa Dios.’

(75) Apan samtang ang tanan sa kinabuhi kinahanglang usa ka pagsimba, kinahanglan nato nga mapahayag ang atong pagsimba sa dayag nga mga buhat. Nag-una niining mga buhat sa pagsimba mao ang personal nga pag-ampo, subay sa panig-ingnan ni Jesus nga migahin og taas nga oras sa pag-ampo nga mihiusa kaniya sa Iyang Amahan. Gawas kon kita mag-ampo usab, kita dili motubo diha sa atong personal nga relasyon sa Dios. Si Papa Juan Pablo II nagpahinumdom kanato nga: ‘Kinahanglan dili gayud hikalimtan nga ang pag-ampo usa ka uyokang bahin sa Kristohanong kinabuhi, sabton diha sa iyang kinatibuk-an ug uyokan.’

Kumusta man ang imong personal nga kinabuhi sa pag-ampo? Nag-ampo ka ba nga nag-inusara? Asa? Unsang panahona? Unsa ka subsob and imong nag-inusarang pag-ampo? Unsang mga matanga sa pag-ampo ang imong ginabansay, o, giunsa man nimo pag-ampo? Unsa may mga intension sa imong pag-ampo, o alang kang kinsa o alang sa unsa man ang imong pag-ampo? ■

## RITO SA PAGESUGOD

*Ibaling ang imong dalunggan, O Ginoo, ug tubaga ako; luwasa ang imong sulugoon nga nagasalig kanimo, akong Dios. Kaloy-i ako, O Ginoo, kay nagsangpit ako kanimo sa tibuok adlaw.*

P: Sa ngalan sa Amahan ug sa Anak ug sa Espiritu Santo.

*K: Amen.*

P: Ang Ginoo maanaa kaninyo.

*K: Maanaa usab kanimo.*

### Pasiuna ug Pag-abi-abi

Karon, kita mag-ampo alang sa Simbahan, alang sa tanang mga katawhan sa mga nagkalain-laing mga tradisyon sa pagtuo ug sa mga tawo nga nagpadayag nga wala motuo sa Dios. Nga ang atong komon nga pagkatawo ug ang atong pagpangita sa hiniusang kaayohan mapalwoman diha sa atong pagpakig-ambit sa mga kasinatian sa gugma ug sa atong pagbinayloay bahin sa atong matinud-anong gituohan. Mag-ampo kita ilabi na alang sa mga katawhan nga mga biktima sa kabangis sa pagkabahin-bahin, pagdumot, pagpahimulos ug sa gubat dinhi sa atong nasud, sa Tungang Sidlakan, sa Amihanang America, sa Sentral ug America Latina ug sa mga nasud sa Africa ug sa Europa.

### Akto sa Paghinulsol

P: Ginoong Jesus, ikaw kanunay nagdapit kanamo sa panaghiusa sa usag usa, ilabi na sa mga kabus ug mga biktima sa kabangis. Ginoo, malooy ka.

*K: Ginoo, malooy ka.*

P: Ginoong Jesus, ikaw mitawag kanamo sa among pagkatalagsaon ug pagkadaiya nga mahimong usa ka banay diha sa imong Ginghamian. Kristo, malooy ka.

*K: Kristo, malooy ka.*

P: Ginoong Jesus, ikaw mihatag kanamo ug mga magbalantay nga uban kanamo diha sa among pagkatawo ug sa pag-aninaw sa imong kabubut-on. Ginoo, malooy ka.

*K: Ginoo, malooy ka.*

P: Kaloy-an unta kita sa Dios nga makagagahum sa tanan ug pasayloon ang atong mga sala, dad-on unta kita niya ngadto sa kinabuhing dayon.

*K: Amen.*

### Himaya sa Diyos didto sa langit...

#### Kolekta

P: Mag-ampo kita: O Dios, ikaw ang hinungdan nga mahiusa ang mga hunahuna sa mga matinud-anon ngadto sa usa ka katuyoan, tugoti ang imong katawhan sa paghigugma sa imong isugo ug sa pagtinguha sa imong isaad, aron nga, taliwala sa kalibutang walay kasiguroan, ang among mga kasingkasing matutok unta diha sa maong dapit diin makaplagaan ang tinuod nga kalipay. ...

*K: Amen.*

### LITURHIYA SA PULONG

#### Unang Pagbasa: Is 22:19-23

L: Pagbasa gikan sa Unang Basahon sa mga Hari

(Basahon gikan sa Kasulatan)

L: Ang Pulong sa Ginoo.

*K: Salamat sa Dios.*

#### Komentaryo sa Is 22:19-23:

Pinaagi sa usa ka panagna, wala dawata ni Isaias ang pangulo sa panimalay sa hari tungod kay siya usa ka langyaw. Naghisgot si Isaias sa umaabot pulihan ang langyaw nga pangulo sa panimalay sa hari sa usa ka tinuod nga lumad nga Israelita. Ang nasudnong soberaniya sa nasud ug ang integridad sa katawhan uban ni Yahweh nga ilang lintunganay nga hari kinahanglang mapreserbar ingon nga usa ka bag-ong pamatasan ug moral nga baruganan sa relasyong internasyonal. Kini sukwahi sa kasaysayan sa mga gubat sa pagsulong, sa mga pag-ukopa nga wala dapita, mga haliling gubat, pag-ilog sa mga gahum ug pagpanlupig sa katawhan sa mga

hari nga wala mahibalo sa alternatibong pamatasan ug moral nga mga sumbanan sa Yahwismo.

**Salmo Responsoryo: Salmo 138:1-2, 2-3, 6, 8**

*(Basahon gikan sa Kasulatan)*

**Komentaryo sa Sal 138:**

Kini usa ka salmo sa pasalamat. Ang unang tulo ka mga bersikulo naghigot sa personal nga kasinatian sa salmista tungod kay ang Dios nakadungog sa iyang pag-ampo. Ang salmista nahimutang halayo gikan sa Templo, taliwala sa mga langyaw, ug gilibutan sa mga lokal nga mga dios. Ang motibo nining awit sa pasalamat: ang kalumo sa Dios ug ang iyang kamatuoran nga naglig-on ug nagpanday sa salmista. Ang salmista kombinsido nga ang Dios diha sa iyang pagkahalandon anaa sa kiliran sa mga timawa ug siya nagpalayo sa iyang kaugalingon gikan sa mga mapahitas-on. Ang salmista nagpaila sa iyang kaugalingon nga uban sa mga ubos, sa mga kabus ug hingpit mitugyan sa iyang kaugalingon ug sa iyang kaugmaon ngadto sa mga kamot sa Dios. Siya masaligon nga ang Dios dili mobiya sa mga buhat sa iyang mga kamot, sa tanang mga tawo nga moduol kaniya alang sa iyang pabang! Kay ang Dios nga iyang gituohan mao ang Dios sa walay kinutubang kalooy ug gugma.

**Ikaduhang Pagbasa: Rom 11:33-36**

L: Pagbasa gikan sa sulat ni San Pablo ngadto sa mga taga-Roma

*(Basahon gikan sa Kasulatan)*

L: Ang Pulong sa Ginoo.

K: *Salamat sa Dios.*

**Komentaryo sa Rom 11:33-36:**

Ang tanghaga halawom: Ang Israel magpabilin nga tig-a hangtud nga ang tanan nga mga Hentil makakaplag sa

Dios. Ug ang Israel maluwas gihapon bisan kon siya misalikway sa Dios, tungod kay ang iyang pagsalikway sa Ebanghelyo mao man ang kaluwasan sa tanan! Ug kini mao ang tinaguan: “Walay tawo nga makatukib sa hunahuna ug mga paagi sa Dios! Dili siya mobiya sa iyang kasabotan sa Israel tungod kay siya nahigugma kanila!” Hunahunaa kini: gibilanggo sa Dios ang tanan ngadto sa pagkamasupilon aron siya mahimong maluluy-on sa tanan! Tungod kay ang tanan nga nilalang nagagikan kaniya, pinaagi kaniya ug alang kaniya. Tan-awa kon unsa kaadunahan ug dili-masukod ang kaalam ug ang pagmatngon sa Dios. Angay lamang nga ang atong tawhanong tubag niining dakong misteryo mao kini: paghimaya sa Dios sa walay katapusan!

**Berso sa Aleluya:**

L: **Aleluya, aleluya.** R: **Aleluya, aleluya!** Ikaw mao si Pedro ug sa ibabaw niining bato tukoron ko ang akong Simbahan ug ang mga ganghaan sa kalibutan sa kangitngit dili makabuntog batok kaniya! R: Aleluya, aleluya! L: **Aleluya, aleluya.**

**Ebanghelyo: Matt 16:13-20**

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

*(Basahon gikan sa Kasulatan)*

P: Ang Ebanghelyo sa Ginoo.

K: *Daygon Ikaw, O Kristo.*

**Komentaryo sa Matt 16:13-20:**

Ang tinuod nga identidad ni Jesus gipadayag karon ngadto sa iyang mga tinun-an. Siya mao ang Mesiyas nga gipaabot sa Israel; ang Anak sa Dios nga magaluwas sa tibuok sa nilalang. Diha kaniya, ang tanang katawhan

mahimong mga anak sa Dios. Si Pedro, nga kinsa gitugyanan niining pagpadayag, gilain gikan sa uban nga mga tinun-an. Ibabaw kaniya ingon nga bato, si Jesus motukod sa iyang simbahan, ang komunidad sa katawhan sa Dios. Bansayon ni Pedro kining responsibilidad ingon nga tigpahigayon sa kabubut-on sa Agalon apan sa walay pagwagtang sa kaligdong sa iyang maayong pag-aninaw sa paghukom alang sa katawhan.

**Wali: Matuman sa Simbahan sa Kabus, pinaagi sa Gagmayng Simbahanong Katilingban, ang iyang identidad diha sa iyang pagpatigbabaw sa bag-ong pamatasan sa panaghiusa tali sa mga nasud ug sa mahigugmaong pagdapig sa mga kabus subay sugo ni Kristo kang Pedro sa Simbahan.**

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
Matuman sa Simbahan sa Kabus, pinaagi sa Gagmayng Simbahanong Katilingban, ang iyang identidad diha sa iyang pagpatigbabaw sa bag-ong pamatasan sa panaghiusa tali sa mga nasud ug sa mahigugmaong pagdapig sa mga kabus subay sugo ni Kristo kang Pedro sa Simbahan.	Tun-i ug pamalandungi ang mga kahimtang sa panagbangi diha sa imong kaugalingon, sa imong pamilya, sa imong komunidad, sa nasud ug sa nagkalainlaing mga bahin sa kalibutan. Unsa ang papel sa mga pangulo diha sa atong GSK ug sa Simbahan sa niini nga mga sitwasyon?	Pagpili og usa ka kinutlong pulong gikan sa mga sulat ug mga wali ni Papa Francisco nga makatubag niini nga mga sitwasyon sa panagbangi. Pamalandongi ang iyang gisulti. Pamalandongi unsa ang iyang gibuhay aron matinuod ang iyang gisulti.

### Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

### Mga Katilingbanong Pag-ampo Katilingbanong Pag-ampo

P: Mga igsoon, diha sa diwa sa mga kabus sa Dios kinsa, diha sa panginahanglan, malipayong nag-abli sa kaugalingon ngadto sa mahigugmaong pagpakabana sa Dios, itugyan nato karon ngadto sa Amahan ang atong mga pangamuyo. Sa matag pag-ampo, kita motubag: Ginoo, nagsalig kami kanimo, pamatia ang mga pag-ampo.

*T: Ginoo, nagsalig kami kanimo, pamatia ang among pag-ampo.*

P: Mag-ampo kita alang sa Simbahan: nga isip usa ka Simbahan sa Kabus sa tibook kalibutan, siya magpadayon sa pagpangulo pinaagi sa pag-ampo ug sa panig-ingnan sa panawagan alang sa tanang katawhan ug mga nasud ngadto sa mas halawom nga pagsinabtanay, makig-angayong pagsinaligay ug panaghiusa alang sa hustisya ug kalinaw sa tibook kalibutan.

*T: Ginoo, nagsalig kami kanimo, pamatia ang among pag-ampo.*

P: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip katawhan sa Dios: nga, dinasig sa Espiritu Santo, sila

magpadayon sa pagpuyo sa ilang epektibong presensyang misyonaryo diha sa mga kahimtang sa panagbangi sulod sa mga indibidwal, sa mga pakigdait nga nabungkag tungod sa walay pagsinabtanay, sa katilingbanon ug internasyonal nga mga relasyon nga nabungkag tungod sa mga hakog nga interes nga nasudnon, pangrelihiyoso ug panghut-ong.

*T: Ginoo, nagsalig kami kanimo, pamatia ang among pag-ampo.*

P: Alang sa mga pangulo sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga sila magpadayon sa pagpangita sa kaayohan sa tanan, pagreporma sa mga dili matarung nga mga balaod ug mga estruktura nga balikwaot ug malupigon sa mga kabus ug sa mga napig-otan.

*T: Ginoo, nagsalig kami kanimo, pamatia ang among pag-ampo.*

P: Alang kanatong tanan, mga lumulupyong sa kalibutan ug mga lungsoranon sa langit: nga kita magdinasigay sa usag-usa sa pagpaminaw sa Pulong sa Dios, pagpaambit sa atong mga kasinatian sa kalingkawasan gikan sa panginahanglang tawhanon ug mga pagpatuyang, ug mag-uban sa pagtukod sa mga kahigayonan alang sa usa ka bag-ong kinabuhi sa kauswagan ug kalinaw.

*T: Ginoo, nagsalig kami kanimo, pamatia ang among pag-ampo.*

P: For our beloved dead: that in the forgiveness of their sins, they may find eternal rest in the heart of our Lord and Savior Jesus Christ. Let us pray to the Lord.

*T: Ginoo, nagsalig kami kanimo, pamatia ang among pag-ampo.*

P: For our special intentions, in the silence of our hearts. (pause)... Let us pray to the Lord.

*T: Ginoo, nagsalig kami kanimo, pamatia ang among pag-ampo.*

P: Ginoong among Dios, malipayong gitugyan namo kanimo ang tanan bahin kanamo, ang tanan nga ania kanamo, ang tanan namong mga damgo ug mga pangandoy. Ihatag kini sila ngari kanamo sumala sa imong kabubut-on. Kini among gipangayo pinaagi ni Kristo among Ginoo.

*T: Amen.*

## **LITURHIYA SA EUKARISTIYA**

### **Paghalad sa mga Gasa**

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

*K: Daygon ang Dios hangtod sa kahangturan.*

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

*K: Daygon ang Dios hangtod sa kahangturan.*

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

*K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.*

### **Pag-ampo Alang sa Mga Halad**

P: O Ginoo, nga nakaangkon alang sa imong kaugalingon ug usa ka katawhan pinaagi sa pagsagop diha sa bugtong sakripisyo nga gihalad sa makausa alang sa tanan, ihatag nga madagayaon kanamo, kami naga-ampo, ang mga gasa sa panaghiusa

ug kalinaw sa imong Simbahan. Kini among gipangayo pinaagi ni Kristo among Ginoo.

*K: Amen.*

### **Prepasyo**

P: Ang Ginoo maanaa kaninyo.

*K: Maanaa usab kanimo.*

P: Ibayaw ang inyong mga kasingkasing.

*K: Amo nang gibayaw ngadto sa Ginoo.*

P: Magpasalamat kita sa Ginoong atong Dios.

*K: Angay ug matarong.*

Kay pinaagi sa iyang pagkatawo nagdala siya ug kabag-ohan sa napukan nga kahimtang sa katawhan, ug pinaagi sa iyang pag-antos, gipapas niya ang atong mga sala; pinaagi sa iyang pagkabanhaw gikan sa mga minatay, gi-ablihan niya ang dalan ngadto sa kinabuhing dayon, ug pinaagi sa iyang pagsaka diha kanimo, O Amahan, gitangtang niya ang kandado sa ganghaan sa langit.

Ug busa, uban sa tanan nga mga anghel, kami nagadayeg kanimo, ingon sa malipayon nga pagsaulog kami nagamantala:

### **Santos**

*K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitasan. Dayegon ang nagaanhi sa ngalan sa Ginoo. Osana sa kahitasan.*

### **Pag-ampo sa Eukaristiya**

*(Human sa konsagrasyon, ang aklamasyon:)*

P: Kini ang misteryo sa pagtoo.

**K: Gisangyaw namo ang imong Kamatayon, O Ginoo, ug gipadayag namo ang imong Pagkabanhaw hangtud sa imong pagbalik pag-usab.**

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

*K: Amen.*

### **Rito sa Pangalawat**

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

*K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalanon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.*

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

*K: Kay imo man ang gingharian/ ug ang gahom ug ang himaya/ hangtod sa kahangturan.*

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tanawa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

*K: Amen.*

P: Ang kalinaw sa Ginoo sa kanunay maanaa kaninyo.

K: *Maanaa usab kanimo.*

P: Ipakita ta ang atong panaginigsoonay.

### **Kordero sa Dios**

K: *Kordero sa Dios nga nagawatang sa mga sala sa kalibutan, kaloy-i kami.*

*Kordero sa Dios nga nagawagtang sa mga sala sa kalibutan, kaloy-i kami.*

*Kordero sa Dios nga nagawagtang sa mga sala sa kalibutan, hatagi kami sa kalinaw.*

### **Pangalawat**

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: *Ginoo, dili ako angay nga mokalawat kanimo, apan ipamulong lamang ug mamaayo ako.*

### **Antipona sa Pagpangalawat:**

*Diha sa Ginoo adunay kalooy; diha kaniya ang madagayaong pagtubos.*

### **Pag-ampo Human sa Pangalawat**

P: Mag-ampo kita: Hingpita sulod kanamo, O Ginoo, kami naga-ampo, ang makapaayong buhat sa imong kalooy ug madagayong hingpita ug agaka kami, aron nga diha sa tanan nga mga butang kami unta makapahinangop kanimo. Pinaagi ni Kristo among Ginoo.

K: *Amen.*

### **Katapusang Panalangin:**

P: Ang Ginoo maanaa kaninyo.

K: *Maanaa usab kanimo.*

Hinaut nga ang imong mga matitud-anong katawhan, O Ginoo, kami naga-ampo, sa kanunay motubag sa mga pag-aghat sa imong gugma ug, natandog sa makapahimsog nga kapiskay, buhaton unta nila nga malipayon ang unsa man gani'y imong

gisugo, aron sa pagdawat sa mga butang nga imong gisaad. Kini among gipangayo pinaagi ni Kristo among Ginoo.

K: *Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: *Amen.*

### **Pagpanglakaw**

P: Lakaw sa pakigdait, ug himayaa ang Ginoo pinaagi sa inyong kinabuhi.

K: *Salamat sa Dios.* ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swipe kini nga QR code.



Please help us continue publishing this Missalette with your donation.

Any amount is appreciated  
no matter how small.

Thank you!

Account Name:

Communication Foundation for Asia  
Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:  
SA# 7090-042-836

Please fax deposit slip to 713-2736  
We are located at # 4427 Old Sta. Mesa St.,  
Sta. Mesa, Manila